

Pauro tapābabaky Tesaronika ezektsa bo ziwatahaka

Pauro Sesus tuktsa Tesaronika eze ziwatahaka anaezektsa Sesus humo batu sispirikpo nisisukyrykynaha iwaze Pauro Sesus tuktsa nisiakusukniki. Deus Pauro ziapewwywyky iwatahi katsa kino niwatihi tanymyryky.

¹ Uta Pauro ababo piwatahaka. Siras Timoteo iwatsa katuk ababo tawatahaka. Ikiahatsa mywatsa Sesus tuktsa tsimaha Tesaronika ezektsa ababo katsa tawatahaka. Deus myzo. Ikiahatsa ityryktsa tsimoziknaha. Sesus Kiristu ahapehatsa niyzik. Deus pahapokzitsiki iwatsahi Deus humo ahakurētsaktsa kytsa.

Hawa Sesus tuktsa Tesaronika ezektsa ustsa mysipokzitsikinaha ana soho hi motsasokonaha.

² Katsaktsa Deus bo tsimypamykysokonahaze ahatsyhyryze ibo tsinapamykysokonaha ipe tsimaha:

— O Deus ikia tsamysapyrēta iwatahi Tesaronika ezektsa tysipokzitsi iwatsahi asaktsa Sesus tuktsa sakurētsa moziknaha — tsimaha.

³ Deus myzo bo tsimypamykysokonahaze ahasoho bo mytsaty tsimykaranaha. Hawa Sesus harere bo hyō tsimykaranaha iwatsahi ihumo ahaspirikporētsa tsimoziknaha ana humo hi mytsaty tsimykaranaha. Ihumo ahapunihikrētsa tsimoziknaha. Sesus humo ahamypokzitsirētsa iwatsahi ihyriziktsokzawy tsizubarēna humo tsimykaranaha. Hawa ahapehaktsa Sesus

Kiristu humo taperyky iwatsahi ahaspihikrētsa. Ihumo ahaspirikporētsa tsimoziknaha.

⁴ Iwaze tatukytsa, iwaze hi Deus ahahumo tsimypokzitsiarēta. Atahi zahawatawy ityryktsa tsimoziknaha niy iwatahi botu zahawatawy. ⁵ Deus wasania ty Jesus soho ahabo tsiktsasokonaha. Deus wasania ty tsiktsasokonahaze myharere zuba baeze. Katsa hi mykzohotsa tsikykarana. Deus hyrikoso humo mykzohotsa tsikykarana. Deus hyrikoso kino izikwy humo tsikykarana. Deus wasaniha humo ahaspirikporētsa tsimoziknaha. Hawa ahatuk tsikzurukunahaze na ha humo ahahyrinymyrētsa. Hawa tsikzurukunaha nawaha ty tsikahatsumuēhīkīnaha. ⁶ Katsa mywatsa mysopyk watu tsikykarana. Jesus watsa tsimyzurukunaha. Hawa tsikzurukunaha ahatukze ikiahatsa niwatihi ktsa mysopyk watu tsikykarana. Mytuk tsinymyrykynaha. Myharere tsiwabytoktokonaha. Iwatsahi Jesus humo ahakurētsa tsimykarana. Deus hyrikoso humo ahakurētsa tsimykarana.

Iwa sinini tsikykarana haze iwatsa tu ahakurētsa tsimykarana. Kytsa zahasukyryky-nahaze Deus hyrikoso humo ahakurētsa. ⁷ Iwaze hawa tsikykarana ana humo Deus tuktsa tsikyziknaha. Masedonia ezektsa Keresia ezektsa kino niwatihi ahasoho motsasokonaha:

— O Tesaronika ezektsa Jesus tuktsa babatsa maha. Katsa asa watsa tsimyzurukunaha zeka wasani tsimaha — mykarana.

⁸ Nanabyitaba kytsa ahasoho ziwabybanaha. Ikiahatsa Deus harere bo hȳ tsimykarana.

ihumo ahaspirikporētsa tsimoziknaha ana kino ziwabybanaha. Masedonia ezektsa, Keresia ezektsa kino niwatihi Jesus soho wasania ty ikiahatsa humo ziwabykynaha. Iwaze katsaktsa ahasoho ty batu tyso. Botu tsiktsasonaha abaka ba ziktsasozonaha. Jesus soho ahahumo botu ziwabybanaha iwatsahi katsaktsa batu tyso. ⁹ Atsa tu mybo nipamykysokonaha. Hawa ababo tsiknakozorenaha soho ty hi nitsasokonaha. Tsikumunahaze myhumo ahakurētsa ana kino nitsasokonaha. Hawa Deus byitsa batu ahakparawy iwatsahi tahaerikiknaha. Deus tuk zuba tsimynapykyryknaha. Deus koikny bakta tu ituk zuba tsimynapykyryknaha. Iharere bo zuba hyŷ tsimykaranaha. Deus babata harere bo hyŷ tsimykaranaha.

¹⁰ Ikiahatsa Jesus zuba tsimyziperykynaha. Atahi Deus tuk mynapykyryk aibatohi zuba mybo myzikziso. Jesus Deus tse. Deus zihyrizikpowy. Atahi mymytsumuēhīkī myhumo tsimypokzitsiarēta. Deus mymysapybara humo takyriki iwaze sinini ykarawy bo mymypehahik. Jesus wy nimytsumuēhī mysapy ziky nihyrikosokda iwatahi myhumo tsimypokzitsiarēta. Iwaze Deus sinini ykarawy bo ba zik mypeha. Iwa ana soho ty nipamykysobanaha.

2

Pauro Tesaronika eze tarabaja nikara.

¹ — O katukytsa katsaktsa ababo tsiknakozorenahaze wasani tsikykaranaha. Ana humo ahahyrinymyrētsa —. ² Tapara

Piripos ezektsa wasanibyitsa nikaranaha. Anaezektsa nimysapybyrikinaha. Kytsa Deus soho humo batu sispirikpotsihik katsa Deus wasania ty tsiktsasokonaha. Iwatsahi katsa ahabo tsikumunaha. Deus humo mypunihikrētsa tsimoziknaha. Deus humo batu mysikpyby. Iwatsahi Deus wasania ty tsiktsasokonaha hŷ.

³ Hawa ahabo ziknatsasokonaha imyibara ty tsikykarana. Deus wasaniha humo tsiktsasokonahaze batu ahaty spihikbata, ahabo tsiktsasokonahaze wasani tsikykarana. Ba aty tohi ty tysihihbata. ⁴ Katsaktsa Deus harere wasani tsimytsasokonaha. Deus kino mype niy:

— O ikiahatsa kaharere ty tynapamykysokonahaktsa! — niy. Iwatsahi iharere kytsa bo tsimyntsasokonaha. Iharere tsimytsasokonahaze mysoho humo — O wasani — mykarana. Katsa kytsa bo iharere tsimytsasokonaha. Deus mozihibik ana hi tsimytsasokonaha. Iharere tsimytsasokonahaze iwaha humo kytsa batu siakparawy. Katsaktsa Deus okzeka wasani tsimaha, atahi nimypeha iwatahi mysoho humo:

— O ikiahatsa wasani tsimykarana — iwa myzeka mykurētsa. Ata kino mysopyk humo tsihyrinymyrēta hawa mytsaty tsimykarana humo tsihyrinymyrēta. ⁵ Katsaktsa ahaspikhbabayitsa. Ahaso humo:

— O Tesaronika ezektsa simysapyrētsa — batu aha. Tsiktsasokonahaze okyrysaro ty batu tykse. Deus zuba myharere humo tsihyrinymyrēta. Hawa tsikykarana humo tsihyrinymyrēta.

⁶ Kytsa myhumo harereziu mykarana zeka ba zikzihikiknaha. Kytsa mype maha:

— O ikiahatsa ahamysapyrētsa — maha. Ana kino ba zikzihiknaha. Ikiahatsa kino niwatihi iwa mybo batu tyso batu hŷ tsimaha. Ustsakytса iwaha ba zikzihiknaha. ⁷Katsaktsa Kiristu nimywatawy. Kiristu mypehakatsa ahape niy:

— O ikiahatsa ahanamy ty ykzohotsa bo nyny tsimahaze. Okyrysaro ty sibo nyny tsimahaze — niy. Katsaktsa iwa ahabyitsa mysopyk. Batu ahanamy ty tytsihik. Ahahumo mymypožitsiukrētsa. Katsaktsa ahajeza wa hi tsipahapožitsikinaha. Ije tadiſahawy ty tahiſrytsa bo nyny mykara ziktatsawa. Katsa kino niwatihi ahahumo mymypožitsirētsa atatsa watatsa. ⁸Tsipahapožitsikinaha. Iwatsahi Deus harere tsiktsasokonaha. Deus wasania ty tsiktsasobanaha. Kytsa pahabeze tsihiknaha zeka katsa tsipahasapyzekynaha. Iwa ahahumo mypožitsi. Katsaktsa ahahumo mymypožitsiukrētsa hŷ.

⁹ O katukytsa mytsatyahaktsa. Hawa ja ahatukze zikzitsumuěhiknaha. Okoroze unata myhyriziktsokzawy humo tsikykaranaha. Mynamyhuak bete iwaze hi mydisahawy tsikzibykyknaha. Iwatsahi ahanamy ty ba mybo nyny zikaha. Iwaze Deus wasania ty ahabo tsikpamykysokonaha. Ahanamy ty batu mybo nyny zikaha.

¹⁰ Katsaktsa ahatukze nawa tsikykaranaha ana humo kino ahahyrinymyrētsa. Deus kino niwatihi tsihyrinymyrēta. Ikiahatsa Deus harere bo hyŷ tsimykaranaha mysoho humo ahahyrinymyrētsa. Katsaktsa ahatukze wasani tsikykaranaha. Deus

okze wasani tsikykaranaha. Ikiahatsa myhumo batu tymyi.

11 Katsaktsa ahazo tsawatsa tsikyziknaha, ana humo hi ahahyrinymyrētsa. Myhyrytsa watsa ahahumo mysopyk. **12** Ana humo ahape tsikykaranaha.

— Ahakurētsaktsa! Deus harere tsiwabytokton-ahaktsa! — tsikykaranaha. Sisukatsihikrētsa pe tsikykaranaha:

— O ahasukatsihikbyihu ja. Deus pahakusukniki — tsikykaranaha. Nawa tyzurukunaha. Iwa zeka Deus ahasoho humo my:

— O wasani mykaranaha. Sihumo kakurēta — my. Deus kino ityryktsa tsimyzihikiknaha humo pahakzo. Ityryktsa ahamysapyrētsa tsimoziknaha ana humo hi pahakzo niy.

Deus harere humo sinini tsikykaranaha.

13 Katsaktsa Deus wasania ty tsiktsasokonahaze tsiwabyziukunaha. Iharere bo hyŷ tsikykaranaha. Iharere bo pykyhytutaha tsiwabytoktonaha. Ikiahatsa tihi:

— Kytsa harere zubahabara Deus harere baba zuba — tsikaha. Wasani mytsaty tsimykaranaha. Deus harere bo yhŷ my. Iharere humo ka meky watu tsimoziknaha. Ikiahatsa Sesus tuktsa harere humo ahamysapyrētsa tsimoziknaha. Iwaze ahahumo mykurētsa. Deus okze mykurētsa tsimoziknaha.

14 O mytukytsa! Sesus tuktsa Sudeja eze tahatukytsa humo sinini nikaranaha. Ikiahatsa kino niwatihi ahaōtutsa pauksitsa humo sinini tsimykaranaha. Astsatu Sudeja ezektsa watsa

sinini tsimykaranaha. ¹⁵ Asahi Sudeutsa Sesus mypehakatsa zibezechiknaha. Tubabatu sizotsa Deus nitsasokonahatsa nisibaiknaha. Abaka Sudeutsa katsa mymlysukyrykynaha. Asahi sakyriwytsitsa tu mozurukunaha. Deus sisoho humo my:

— O asahi simysapybyrikitsa mykaranaha iwatahi takyriki — mykara. ¹⁶ Sudeutsabyitsa bo tsikykaranaha. Deus wasania ty Sudeutsabyitsa bo tsimytsaso tsihikiknaha. Asahi Sudeutsa Deus harere bo batu hŷ niaha iwatsahi myharere pepyk tsihikiknaha. Sudeutsabyitsa Deus bo mysioktyhyryk tsihikiknaha. Asaktsa Sudeutsa batu yhŷ niaha iwatsahi myharere pepyk tsihikiknaha. Tapara simysapybyitsa nikaranaha. Abaka simysapybyyi niubara. Iwatahi Deus takyriki. Simysapybyitsa humo takyriki. Atahi:

— O ikiahatsa batu ahamysapy niy. Ahahumo pahasininiwyky — Deus niy.

Pauro Tesaronika bozo mynakozore tsihikik.

¹⁷ O mytukytsa kytса pokso tsikwakiknaha, ahatuk tsimymysapy tsihikiknaha zetu. Ikiahatsa humo myhyrizikbarētsa. Ahasoho bo mytsaty zik-nakaranaha. Ahabo tsipiksizo tsihikiknaha zetu. ¹⁸ Ikiahatsa bo tsiksikzykynaha ezetu. Uta hi ikz-ihikik ezetu batu zik. Satanas hyrikoso sapybara pehatsa humo wyzik batu. Iwatsahi ba ahabo zikumunaha.

¹⁹ Uta ezetu ahabo mynakozore tsihikik. Ikiahatsa humo hi mykurētsa. Ustsа kino niwatihi aha humo sakurētsa. Sesus mybarawy bo myziksizoze katsaktsa ituk tsinapykyryknaha. Ikiahatsa Sesus

harere bo hȳ tsimykaranaha humo ahaspirikporētsa tsimoziknaha, iwahatu tu ahakurētsa. Sesus myziksizoze ipe tsimaha:

— O aharere Tesaronika ezektsa bo tsiktsasokonaha. Ana hi ziwabykynahaze hȳ nikaranaha — tsimaha. Ikiahatsa ituk tsimypykyryknaha ana hi taperyky. ²⁰ Ikiahatsa humo mykurētsa. Iwahatu katsaktsa ustsa kytsa pe:

— O Tesaronika myzubaha ezektsa simysapyrētsa maha — tsimaha. Iwa ahasoho bo mytsaty tsimykaranaha.

3

¹ Iwaze batu ahabo iktsa tsimaha. Ahahumo myhyrizikbarētsa iwatsahi batu mykubyrisorok. Iwatahi uta hi:

— O katsaktsa Atenas eze tsimypykyryknaha. Utakta, Siras ahatsa niwatihi katsa zuba tsimynapykyknaha.

² Iwaze Timoteo pe:

“O ikiakta tsiksikta. Tesaronika ezektsa bo tsimy” — iky.

— Hȳ iky — niy. Iwatahi ahabo zipeha. Timoteo mytsy. Mytuk botu Deus tsyhryzye myhyriziktsokzawy mynakara. Deus wasania ty Kiristu soho natsasoko. Utakta ipehata tih iwatahi pahakusukniki. Kiristu harere bo yh̄ tsimykaranaha, ihumo ahaspirikporētsa ana soho humo pahatsumuēhī. Iwatahi zipehahik. Iwaze Timoteo niparak.

³ Iwatsa tu batu aty tohi Sesus harere bo batu h̄y zikaha, ihumo batu ahaspirikpo isukyrywy humo. Sesus humo sinini tsimykaranaha zeka iwatuze

iharere bo ma tsimaha. Kytsa pahasukyrynah
ze ka iwaze ikiahatsa Sesus harere bo ma
t似imaha. Ikiahatsa sinini tsimykaranaha
anahumo hi ahahyrinymyrētsa. Deus botu
zahahyrinymyryky. Kytsa mymrysukyrynah
humo ahahyrinymyrētsa. ⁴ Tubabatu katsa
ahatukze tsiktsasokonaha. Hawa sinini
t似imykaranaha soho botu tsiktsasokonaha.
Ahabo botu tsiktsasokonaha atsawatu
nikaranaha. ⁵ Iwatahi ahasoho iwaby tsihikik.
Tozeka ja Sesus humo ahaspirikporētsa ana soho
hi iwaby tsihikik. Ahahumo kahyrizikbarēta.
Iwatahi Timoteo ahabo iakzohik. Ahabo ipēha
tahi niparakze ipē iky:

— Tesaronika bokta. Tesaronika ezektsa hawa
ja mykaranaha sibo iktsaty — iky. Kapetu ikykara
tozeka ja Sesus humo sispirikporētsa moziknaha.
Tozeka ja Diabo hyrikoso sapybara pehatsa my-
sisapybyikik. Tozeka ja myharere piwabyziuku-
naha. Tozeka ja myhyriziktsokzawy anaeze
zimyikinaha ana humo nikaranaha. Iwa ha humo
mytsaty ikykara. Iwatahi Timoteo ahabo zipeha
iwatahi niparak.

⁶ Abaka Timoteo botu ziksizo. Ahasoho ty ni-
pamykysoko iwatsahi mykurētsa tsimykaranaha.
Atahi:

— O Sesus harere bo hȳ mykaranaha, ihumo
sispirikporētsa wasani mykaranaha. Kytsa humo
simypokzitsiukrētsa mykaranaha — niy. Atahi
mybo nipaykysoko, hawa mysoho bo mytsaty
t似imykaranaha nikara. Atahi:

— O ahasoho humo sihyrizikbarētsa
mykaranaha. Hawa ikiahatsa mybo tsimykozore
tsihikinaha. Katsa kino niwatihī ahabo

tsimynakozore tsihikiknaha — nikara. ⁷ Iwatsahi katukytsa sinini tsimykaranañahaze ahahumo mykurētsa. Amy tsihokdaharēna zeka ahahumo mykurētsa tsimaha. Sesus humo ahaspirikporētsa iwatsahi mykurētsa.

⁸ Abaka ikiahatsa Sesus humo ahaspirikporētsa. Iwatsahi katsa ahahumo mykurētsa. Sesus humo tsimyspirikpokonaha zeka mykurētsa hŷ. Katsaktsa Deus bo tsimypamykysokonahaze tihi:

⁹ — O Deus ikia zuba tsamysapyrēta. Sesus tuktsa Tesaronika ezektsa aharebo hyŷ mykaranañahaze sihumo mykurētsa hŷ — tsimykaranañahaze. Iwatsahi batu mykubyri zikzumu Deus bo ahasoho ty tsikpamykysokonaha. Deus okzeka, ahahumo mykurētsa. ¹⁰ Natabyituhukutu Deus bo tsinapamykysokonaha. Ahabo tsimykozorenaha zeka Deus harere tsimytsasobanaha. Iwaze Sesus humo tsimyspirikponaha baba.

¹¹ Deus myzo. Sesus myhyrinymyrytsa atahi mymytsumuēhīnahaze. Iwatsa tu ababo tsimynakozorenaha. Tsipahatsumuēhīnahaze. Abaka amy ihokdaha humo tsipahatsumuēhīnahaze. Iwatsahi ababo tsimynakozorenaha. ¹² Deus namysapywyky iwatsahi tyharape pokzitsikinahaktsa. Taharape pokzitsitohinahaktsa. Kytsa sizubarētsa bo kino niwatihi sihumo ahamypokzitsiukrētsa tsimykaranañahaze. Katsa mywatsa tsimoziknaha. Myzubaha humo mypokzitsiukrētsa, ikiahatsa kino niwatihi tynakaranahaktsa kytsa.

¹³ Iwatsahi ahamysapybyitsa tu tsimykaranañahaze zeka anaka tsimoewynahaktsa. Kyze Sesus myhyrinymyrytsa myziksisoze wasanitsa

tsimaha. Tsimyharape pokzitsikinaha zeka ba ahasikpyby. Deus myzo okeryk tsinamykahahanahaze ba ahasikpyby. Sesus mypehakatsa myziksizoze tatyryktsa tatuk mysioktyhyk. Deus tatyryktsa soho pe my — O Tesaronika ezektsa wasani mykaranaha. Tahamysapybyi zimoewynaha. Deus harere bo zuba hyŷ mynakanaha — mykaranaha.

Iwa Deus tyryktsa mykaranaha. Deus okzeka ahamysapyrētsa tsimoziknaha.

4

Wasani zubaha ty tsimykaranaha anahi Deus mozihikik.

¹ Aba ahabo botu tsiktsasokonaha katukytsa. Hawa tsimyzurukunaha anahi ahabo botu tsiktsasokonaha ana kino tsiwabyziunaha. Deus harere bo hyŷ tsimykaranaha ana humo hi ahaspirikporētsa tsimoziknaha. Iwaze Deus ahahumo tsakurēta. Aba iwa zubahaty tsimaha zeka tisapyrēna ty tsimykaranaha. Abaka tisapyrēna ty puētsiktahaktsa. Abaka ahape my:

— Deus harere bo hyŷ tynakaranahaktsa kytса. Mytsasokozo mypehakatsa Sesus humo ahape my. Deus harere humo pykyhytu tynakaranahaktsa kytса —. ² Myharere bo mytsatyta! Myspirikpowy tynakaranahaktsa kytса. Myhyrinymyrywy iwa ahabo tsimykaranaha. Mypehakatsa Sesus humo hi ahabo tsimytsasokozonaha.

³ Wasani my ana humo kino Deus mozihikik. Sesus harere humo pykyhytu tahaktsa kytса. Iki-ahatsa ahaokeza humo zuba tsizahaspihiknaha.

Mektsa okeza bo ka hua hua byitaha. Wytykyryk kino niwatihi mekykyry pyitsa bo iktsa zuba tynakaranaha. ⁴⁻⁵ Ikiahatsa aokeza humo pykyhytutaha, Deus okzeka pykyhytutaha. Kytsa okzeka humo niwatihi pykyhytutaha. Ikiahatsa tsipasukzanaha zeka ahaokeza ty myiwy myiwy byitaha. Kytsa asahi Deus harere humo sihyrinymyrybyitsa ikiahatsa ba siwa zikaha mektsa okeza bo hua mynakaranaha. Ikiahatsaktsa ahaokeza bo zuba tynakaranaha.

⁶ Ahatukytsa humo ba zikaha. Siokeza bo hua hua byitaha. Ahatukytsa humo, ba zik sispihikbatanaha. Botu ababo tsiktsasokonaha aba katsa tsimytsasokozonaha. Tisapyrēna ty tsimykaranaha. Atakta meky watu my zeka Deus ihumo takyri. Atahi:

— O batu imysapy my —. ⁷ Deus ta wasaniha mozihikik ana humo hi zahawatawy. Hawa wasania tyhi tsimykaranaha h̄y. Tamyikik zeka batu mymypsyp. Usta oke tsipihuahua zeka batu amysapy tsimozik. ⁸ Aty kamyspirikpowy ahabyi zeka atahi Deus harere bo batu h̄y my. Ana kino kytsa harere zeky batu, Deus harere baba zuba. Deus hyrikoso mytuk mynapykyryk iwatsahi iharere bo hȳ tsimykaranaha.

⁹ Ikiahatsa ahatukytsa humo ahamypokzitsiukrētsa tsimykaranaha. Ikiahatsa Sesus tuktsa tsimaha iwatsahi ahatukytsa humo ahamypokzitsiukrētsa iwaze ana soho batu tywataha. Deus pahahyrinymyryky iwatsahi tyharape pokzitsikinaha. ¹⁰ Iwa tsimykaranaha iwatahi ana soho hi batu tywataha. Sesus

tuktsa Masedonia: ezektsa asa humo niwathihi ahamypokzitsiukrētsa. Abaka ahape my.

11 — O tyharape pokzitsitohinahaktsa kytsa — tsimaha. Tapara ababo tsiktsasokonaha hi:

— Ahaokanihinymyrybyihu ja! Ahaharere-wabymybarabyihu ja. Ahahyriziktsokzawy humo tahaktsa iwatsahi ahadisahawy humo tsipahazisakanaha. Iwa tsimyzurukunaha. Tsimytsasokozonaha iwa tuzurukunahaktsa kytsa. Iwa tsimyzihikiknahaktsa kytsa — tsimaha.

12 Iwaze kytsa Sesus harere bo yh̄y ahabyitsa ihumo batu sispirikpo ahasoho:

— O asaktsa wasani simysapyrētsa — mykaranaha. Ikiahatsa ahanamy humo zuba tsizahaspihikiknaha iwatsahi ustsa bo ba zikzapykyzonaha — kaboja kaboja — byi tsimaha. Ikiahatsa iwaze ahamysapyrētsa tsimoziknaha.

Sesus myziksizo naha soho.

13 Mytukytsa katsa tsipahaspirikpokonaha siakbatsa soho humo ahahyrinymyrētsa tsimoziknaha h̄y. Siakbatsa soho motsasoko iwatsahi sihumo batu ahasukatsihik. Asaktsa Sesus harere bo hȳy nikaranaha ihumo sispirikporētsa nikaranaha abaka siakbatsa humo kino batu ahasukatsihik. Kytsa asahi Sesus ba ziperykynaha sisukatsihikrētsa. Maku estuba situk mohyrikosokda zeka sisukatsihikrētsa. Mohyrikosokdaze ba Sesus tuk zikapykyryk iwatsahi sisukatsihikrētsa. Ikiahatsaktsa batu, Sesus tsipiperykynaha.

14 Sesus nihyrikosokda. Iwaze inahyrizikpo ana humo hi myhyrinymyrētsa. Siakbatsa kino

niwatihi mynahyrizikponaha Sesus watsa. Deus Sesus mybarawy bo pipeha iwaze myziksizo. Siakbatsa Sesus humo sispirikporētsa asahi ituk mynasiknaha. Sesus tatuk mynasiokty. Ana humo kino myhyrinymyrētsa.

¹⁵ Amy ty ababo motsasoko mypehakatsa katsa botu nimyhyrinymyryky. Ababo motsasoko amy ty Sesus nimyhyrinymyryky. Sesus bijoikpe ikny myziksizo, atahi siakbatsa nasihyrizikpowy. Myziksizoze siakbatsa mynahyrizikponaha. Iwaze hi katsa mykbabyitsa tahahobyknaha. Ibaze tsinazuzukbanaha. Tapara siakbatsa inahyrizikpobanahatsa iwaze katsa ibo tsinazuzuknaha. ¹⁶ Sesus myziksizoze kytса iaksoho opykani huawa maha piwabynaha. Bijoikpe iknykta Deus tsumuēhītsa huawa myze anahi piwabynaha. Deus porawy itsumuēhītsa pioke hu hu nahaze ana kino niwatihi piwabynaha. Iwaze Sesus bijoikpe ikny mynasik. Tapara siakbatsa Sesus humo sispirikpotsa asahi mynasihyrizikpobanaha. ¹⁷ Iwaze katsa mykbabyitsa Sesus bo bijoikpe bo jobo tsimydoknaha. Siakbatsa Sesus nasihyrizikpowy situk bijoikpe bo tsimydoknaha. Anaeze tahahobyknaha. Anaeze tsimynazuzuknaha. Anaeze Sesus pauk baze tu mywahi tsimynapykyryknaha. Ituk mywahi tsimynapykyknaha h̄y.

¹⁸ Iwatsahi iharere humo batu ahasukatsihik tsimaha. Iharere humo kytса tysiitsumuēhīnaha. Iharere humo tysiakuwykynaha.

5

Sesus myziksizo naha taperyky.

¹ O katukytsa ikiahatsa hi:

— Hawa taeze ja Jesus myziksizo. Hana wa byzoje pitsuze ja Jesus myziksizo — tsimaha. Ana soho ka batu piwataha. Ikiahatsa botu tsinymyrybanaha, Jesus myziksizo naha humo ahahyrinymyrētsa. Atsoko myziksizo. Kytsa humo zipery nahabara tu atsoko myziksizo.

² Itsyhyyboarēnikita unata mozumuze tawata. Kytsa ibo mytsaty ahabyitsa tu mykaranaha, iwaze atsoko anamy pebykbaik. Nawa puruze Jesus myziksizoze itsyhyyboarēnikita wata ity pery ahabyita bo sibo zumu. Jesus niwatihi my kytsa ity pery ahabyitsa tu myziksizo atsoko myziksizo.

³ Atsoko wytyk ibykyhy natapyrize atatsa watatsta. Anawa hi Jesus myziksizoze atsoko myziksizo. Kytsa mytsaty ahabyitsa tu atsoko sibo mozumu. Kytsa hi:

— O abaka batu amy tohi mahaze abaka tisapyrēna niyzik my — mytsaty ahabyitsa tu nikaranaha. Iwa mytsaty mykaranahaze atsoko Jesus myziksizo. Atsoko ipokso sipybyrētsa moziknaha. Ba aty tohi ipokso zikwak. Iwa my Jesus myziksizoze atsoko myziksizo. Wytyk tabykyhy pepurukze imyitsapyri ziktatsa watatsta Jesus myziksizoze kytsa sinini mykaranaha hŷ.

⁴ Mytukytsa Deus harere tsiwabyziukunaha hŷ. Ikiahatsa ahahyrinymyrētsa. Jesus myziksizoze ky humo tsipiperykynaha.

Ikiahatsa itsyhyryboarēnikita ahapapa tu mozumu nahaze kywa anawahi Sesus taperyky tsimaha. Kytsa miwa haburuk tu pyrik mykaranaha zeka ba zikozonaha. Okoro eze zuba mokozonaha. Iwatsahi ikiahatsa batu kytsa watsa miwa haburuk tu pyri mykaranaha tsawatsabyitsa. Wasani tsinymyrykynaha, hawa kytsa okoro eze mokozonaha, siwatsa wasani tsinymyrykynaha. Iwatsahi Sesus myziksizoze ikiahatsa kino tsipiperykynaha, iwaze hawa wasani tsimyzurukunaha. ⁵ Deus harere humo ahahyrinymyrētsa. Iwatsahi ikiahatsa kytsa okoro eze pitabakanaha siwatsa tsimaha. Hawa tsimykaranaha okoro ezektsa watsa tsimaha, ahahyrinymyrētsa. Kytsa Deus harere bo batu h̄y mykaranaha, asahi kytsa unata ezektsa watsa maha batu sihyrinymyry. Sihyrinymyrybyitsa hi paikpa mytsaty mykaranaha, siwatsa miwa haburuk pyrik mykarannahatsa watsa. Katsaktsa batu.

⁶ Iwatsahi ahapasatsihikrētsa tsimykaranaha batu siōtutsanikitsa watsabyitsa. Iwa zeka batu paikpa mytsaty tsimykaranaha. Tykymybanahaktsa kytsa. Ba zikwakyrimaha. Wasani mytsatyahaktsa! Ustsa kytsa mowakyrikiknaha zeka ikiahatsa batu zikaha iwa ba zikzurukunaha.

⁷ Unata hi tsizurubakanaha iwaze hi unata tsōši zikzikuikiknaha asaktsa simysapybyrikitsa pypykbe mynakaranaha. ⁸ Katsa batu. Katsa okoro ezektsa tsipitabakanahaziktsa watsa tsimyzurukunaha, Sesus taperyky. Tsipiperykynaha Sesus humo myspirikporētsa iharere bo zuba hȳ tsimykaranaha iwatsahi Satanas harere

bo batu hŷ tsimaha. Mymysapybyitsa tu mahani tsimykaranaha. Deus humo mymypožitsirētsa. Kytsa humo niwatihi mypožitsirētsa. Sesus katsa mymyoktyhyryk ana hi taperyky.

⁹ Deus nimywatawy. Iwatsahi katsa kino ituk mywahi tsinapykyryknaha. Mysapybyity tsikykaranaha tamoewy iwatahi Deus pahaokzohik ana humo hi nimywatawy. Mysapybyitsa tsikykaranaha ana humo hi sinini ykarawy bo Deus mymypeha ana humo hi Deus batu mytwatawy. Mypehakatsa Sesus Kiristu takino Deus bo mymyoktyhyryk ana humo nimywatawy. ¹⁰ Atahi mysapyzeky nihyrikosokda iwatsahi katsa ituk mywahi tsimynapykyknaha. Tsimyhyrikosokdanahaze aibatohi eze zuba Sesus myziksono ituk tsimynapykyryknaha. Mohyrikosokda byizeka aibani zuba Sesus myziksono astatu, katsa ituk mywahi tsimynapykyryknaha.

¹¹ Iwatsahi iharere humo ustsā kytsa tysitsumuēhīnaha. Tynasiakuwykynaha. Katsa aba tsimyzurukunaha Sesus tuk mywahi tsimynapykyryknaha ana humo hi tynasiakuwykynaha.

Aba myspirikpowy pepykykze ahape mykarazo.

¹² O mytukytsa asahi pahahyrinymyrykynaha pykyhytu siharere bo wabyziutaha. Asahi ahahumo simypožitsiukrētsa mykaranaha, hawa mypehakatsa Sesus motsasoko naha tihī mykaranaha. Asahi pahahyrinymyrykynaha. Ahatsyhyryze pahatsumuēhīkīnaha ahapehatsa moziknaha. ¹³ Iwatsahi sihumo

ahamypokzitsiukrētsa tsimykaranaha.
 Iwatsahi mykparawytsa. Mypehakatsa Sesus nisiwatawy nahatsa pahatsumuēhīnaha, iwaze pahatsumuēhīnahaze tysipokzitsikinahaktsa kytса! tsimaha. Ahatuk zeka awatu tynakaranaha! Ahakurētsa tsimoziknaha.

14 O mytukytsa kaharere motsasokozo. Kytsa asaktsa sidikarēnikitsa pe:

— Myhyriziktsokzawy humo tyzikbyituhukunahaktsa — tsimaha. Siakubyitsa tynasiakuwykynaha. Kytsa Sesus harere humo tsikaeni zuba sihyrinymy zeka iwatsahi ihumo puētsik zuba nisispirkponaha asahi tysitsumuēhīnaha. Sipybyrēnikitsa tysitsumuēhīnaha, ahapybybyihu ja tsimaha. Kytsa sasabyitsa humo ja ahakubyrisoroku. Tohi ahatuk imysapybyita ty my zeka ba zik taokani, ihumo wasani tynakara iwa ahatuk tynakaranaha. **15** Pykyhytutaha! Ikiahatsa aty pahakyryty zeka ba zikatsapusare. Aty pahakyrytzeka ba zikaha tsapusare. Ikiahatsa tsipokzitsinaha. Ahatuk sasabyitsa humo tysipokzitsikinaha hÿ.

16 Ahahakurētsa tynapykyknaha!

17 Deus bo zuba tynapamykysokonaha kytса!
 Deus bo tsimykaranaha. **18** Deus bo tyzikbyituhukunahatu nawa tsimaha:

— O Deus ikia humo mykurētsa tsimaha. Amy ty mybo nyny tsimykara naha ty wasani my — tsimaha. Iwa tsimypamykysokonaha Deus pe tsimykaranaha. Ahaku zeka iwa Deus bo tsimypamykysokonaha. Ahakubyize kino iwa Deus bo tsimypamykysokonaha. Hawa ha tsihokdaharēna

zeka iwa tsimypamykysokonaha. Ana hi Deus mozihikik, Jesus tuktsa bo mozihikik. Wasani my tsimykaranaha Deus hyrikoso batu meky watu tsimaha.

¹⁹⁻²⁰ Aty ahatus motsasoko zeka Deus hyrikoso humo tsiwabytoktokonahaktsa. Deus hyrikoso abo motsasoko zeka pykyhytu wabyziutaha. Wabyziu byizeka ba abo motsasozo my iwatsahi iharere bo pykyhytu wabytaha. ²¹ Kytsa tihi:

— O katsaktsa Deus hyrikoso humo tsimyt-sasokonaha — nikaranaha. Siharere soho humo mytsatyziutaha. Siharere wasani habo zuba hȳ tsimaha. Siharere sapy byizeka ana bo ka ba h̄y tynakaranaha iwaze kytsa mybarapetu nikaranaha. ²² Hawa mysapybyiw y zeka tsi-moewynahaktsa!

²³ Deus hi mymyakuwyky h̄y. Utakta ipe my:

— O Deus tysipokzitsikta. Iwatsahi simys-apyr̄etsa moziknaha — my. Jesus Kiristu myzik-sizoze ahamysapyr̄etsa h̄y. Batu ahasikpyby. Deus pahapokzitsiki iwatsahi mypehaktsa Jesus Kiristu myzik-sizoze batu ahasikpyby my. ²⁴ Deus hi nimywatawy iwatahi namypokzitsiki. Iharere wasani my hawa ziknakara atsawatu mynakara.

²⁵ Ikiahatsa mytsyhyryze Deus bo tsimypamykysokonaha. Katsa atukytsa tsimaha.

²⁶ Mytukytsa bo tuharapehapyryknahaktsa kytsa.

²⁷ Uta ababo motsasoko Jesus harere ty motsasoko. Amy ty ziwatahaka ustsa mytukytsa sasabyitsa bo tsipinynaha.

Deus pahasapywyky.

28 Abaka Deus pe my:
— O Sesus Kiristu tysipokzitsikta. Sihumo
amypokzitsiukta — my. De.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

**PDF generated using Haiola and XeLaTeX on 11 Nov 2022 from source files
dated 29 Jan 2022
2f0260ea-5969-5180-9ac5-183d63a989f1**